

Bosna i Hercegovina
Federacija Bosne i Hercegovine
Kanton Sarajevo
Grad Sarajevo
OPĆINA NOVI GRAD SARAJEVO
Općinsko vijeće

Broj: 01-02-17132/25
Sarajevo, 05.08.2025. godine

OPĆINA NOVI GRAD SARAJEVO OPĆINSKI NAČELNIK

PREDMET: Vijećnička pitanja i inicijative, dostavlja se

Na 9. radnoj sjednici Općinskog vijeća općinski vijećnici postavili su nekoliko vijećničkih pitanja odnosno pokrenuli su vijećničke inicijative sljedećeg sadržaja:

- a) Vijećničke inicijative

-klub vijećnika SDA -

1. Inicijativa za postupanje općinske inspekcije zbog nelegalnog dovoza zemlje i otpada u ulici Butilska (kod brojeva 206 i 208)

Podnosilac: Klub vijećnika SDA Novi Grad Sarajevo

Klub vijećnika SDA podnosi inicijativu kojom tražimo da nadležna općinska inspekcija izađe na teren i izvrši inspekcijski nadzor u ulici Butilska, u neposrednoj blizini kućnih brojeva 206 i 208, gdje se, prema informacijama građana, vrši nelegalan dovoz zemlje i različitog otpada.

Takve aktivnosti ugrožavaju komunalni red, mogu imati negativne posljedice po okoliš, a postoji i sumnja da se radi o pripremi terena za bespravnu gradnju ili formiranje divlje deponije.

S tim u vezi tražimo:

da se izvrši hitan inspekcijski nadzor na navedenoj lokaciji,

da se utvrdi identitet odgovornih osoba i preduzmu zakonom predviđene mjere,

da se o provedenim aktivnostima dostavi informacija Općinskom vijeću i podnosiocu inicijative.

Smatramo da je hitno postupanje važno kako bi se spriječilo dalje narušavanje prostora i zaštitili interesi građana.

2. Inicijativa za vraćanje u funkciju autobusnog stajališta Dobrinja 2 (Vijećnica–Dobrinja)

Ministarstvu saobraćaja Kantona Sarajevo

Klub vijećnika SDA u Općinskom vijeću Novi Grad Sarajevo upućuje ovu inicijativu Ministarstvu saobraćaja KS-a, s ciljem vraćanja u funkciju autobusnog stajališta Dobrinja 2, koje se nalazi na relaciji Vijećnica–Dobrinja, u ulici koja povezuje Bulevar Mimara Sinana i ulicu Želimira Vidovića–Kelija, u naselju Dobrinja 2.

Iako stajalište nikada nije bilo fizički uređeno (nema nadstrešnicu niti zaustavno proširenje), dugi niz godina koristili su ga brojni građani, upravo zbog njegove izuzetno frekventne i praktične lokacije – u neposrednoj blizini prodavnica, pekara, apoteka i drugih sadržaja koji čine jezgro svakodnevnog života stanovnika Dobrinje.

Prije otprilike godinu dana, ovo stajalište je ukinuto, bez ikakvog zvaničnog obrazloženja, čime je putnicima otežan svakodnevni pristup javnom prijevozu, jer su prethodno i naredno stajalište znatno udaljeni od centralnog dijela naselja.

S druge strane ulice, u suprotnom pravcu (Dobrinja–Vijećnica), stajalište koje također nije fizički formirano, i dalje je u funkciji, s postavljenom nadstrešnicom na zelenoj površini. To dodatno potvrđuje opravdanost i mogućnost brzog vraćanja predmetnog stajališta u upotrebu.

Predlažemo i tražimo da Ministarstvo saobraćaja KS poduzme sve potrebne aktivnosti kako bi se autobusno stajalište Dobrinja 2 što hitnije vratilo u funkciju, a u narednoj fazi i tehnički uredilo u skladu sa standardima.

3. Inicijativa za sanaciju lokalnih servisnih saobraćajnica povezanih sa ulicom Džemal Bijedić u okviru realizacije sporazuma Direkcije za ceste KS sa Općinom Novi Grad Sarajevo

Poštovani,

Klub vijećnika Stranke demokratske akcije (SDA) u Općinskom vijeću Novi Grad Sarajevo upućuje ovu inicijativu Direkciji za ceste Kantona Sarajevo, u cilju unapređenja saobraćajne funkcionalnosti i povezanosti na području Općine Novi Grad Sarajevo, tačnije u zoni obuhvata ulice Džemal Bijedić.

Naime, u okviru planirane rekonstrukcije i izgradnje ulice Džemal Bijedić, koja se realizira na osnovu potpisanog sporazuma između Direkcije za ceste Kantona Sarajevo i Općine Novi Grad Sarajevo, smatramo neophodnim da se paralelno izvrši i sanacija lokalnih servisnih saobraćajnica koje su direktno povezane s ovom saobraćajnicom.

Ove servisne ulice, koje funkcionišu kao pristupne ceste za stambene blokove, poslovne objekte i druge sadržaje, trenutno su u lošem stanju, oštećena kolovozna konstrukcija, neadekvatna odvodnja i izostanak horizontalne i vertikalne signalizacije otežavaju svakodnevni protok saobraćaja i umanjuju sigurnost svih učesnika. Sanacijom ovih saobraćajnica u isto vrijeme s glavnim radovima na ulici Džemal Bijedić, osigurala bi se:

- potpuna funkcionalna povezanost glavne i sporednih saobraćajnica,
- bolja protočnost i sigurnost saobraćaja,
- ušteda javnih sredstava kroz racionalno izvođenje radova u jednom terminu.

S tim u vezi, Klub SDA Novi Grad Sarajevo predlaže da Direkcija za ceste Kantona Sarajevo, u koordinaciji sa Općinom Novi Grad, proširi obuhvat radova definisanih Sporazumom, te uključi sanaciju i rekonstrukciju pomenutih servisnih saobraćajnica.

Uvjereni smo da će ovaj prijedlog biti prepoznat kao opravdan i u interesu građana, te Vas pozivamo da ovu inicijativu razmotrite i u skladu s nadležnostima pokrenete potrebne korake.

4. Klub SDA Novi Grad Sarajevo pokreće inicijativu za sanaciju sportskog igrališta koje se nalazi na Dobrinji V, u ulici Sulejmana Filipovića, iza broja 18.

Naime, navedeno igralište predstavlja važan prostor za rekreaciju djece, mladih i stanovnika ovog dijela naselja. Međutim, trenutno se nalazi u veoma lošem stanju, što znatno umanjuje njegovu funkcionalnost i sigurnost. Posebno ističemo dvije ključne potrebe:

1. Sanacija zaštitne mreže/ograde

Postojeća ograda je oštećena i djelimično nepostojeća, što dovodi do učestalih izlijetanja lopti na okolno šetalište, te predstavlja rizik za sigurnost djece i prolaznika.

2. Postavljanje i/ili sanacija rasvjete

Trenutno na igralištu ne postoji adekvatna rasvjeta, što onemogućava korištenje igrališta u večernjim satima, posebno u zimskom periodu. Postavljanje rasvjete značajno bi doprinijelo produženju vremena korištenja igrališta i povećanju sigurnosti korisnika.

S obzirom na sve navedeno, predlažemo da nadležne službe uvrste ovu inicijativu u plan sanacije i održavanja javnih površina u što skorijem roku, te da se izdvoje sredstva za:

- Popravku i zamjenu zaštitne mreže/ograde oko cijelog igrališta,
- Postavljanje odgovarajuće LED

Vjerujemo da će realizacija ove inicijative pozitivno uticati na kvalitet života stanovnika, te doprinijeti razvoju sportskih i rekreativnih aktivnosti u našem naselju.

5. Inicijativa za osvjetljenje sportskog igrališta u Potur Šahidijinoj ulici.

Obrazloženje: Pokrećem inicijativu za osvjetljenje sportskog igrališta u ulici Potur Šahidijina na području Mjesne zajednice „Alipašin Most I“. Sportsko igralište na Vitkovcu je jedno od dva igrališta koja se nalaze na teritoriji mjesne zajednice, te svakodnevno okuplja veliki broj djece i omladine s akcentom na večernje sate. Na ulazu u igralište nalazi se spomen obilježje ubijenoj djeci sa područja naselja te ni ono nije osvijetljeno. Molim vas da razmotrite mogućnost postavljanja led rasvjete kako bi se omogućio ugodniji i sigurniji ambijent za korisnike istog. U Prijedlogu zahtjeva iz oblasti infrastrukture mjesne zajednice „Alipašin Most I“ od 2024. godine pod tačkom Javna rasvjeta nalazi se stavka Postavljanje led rasvjete na sportskom igralištu u ulici Potur Šahidijina;

6. Inicijativa za zamjenu stare i dotrajale rasvjete u ulici Goraždanska.

Obrazloženje: Pokrećem inicijativu da se izvrši zamjena stare i dotrajale rasvjete u Goraždanskoj ulici. Naime riječ je o zamjeni jedanaest rasvjetnih tijela u pomenutoj ulici. Trenutna rasvjeta je u jako lošem stanju, te vas molim da u skladu sa raspoložim sredstvima isplanirate zamjenu rasvjetnih tijela.

7. Inicijativa za postavljanje radara/kamere za mjerenje brzine u ulici Safeta Zajke – između dva kružna toka / IX transferzale i kružnog toka Vitkovac/.

Obrazloženje: Pokrećem inicijativu da se uputi zahtjev MUPKS za postavljanje adara/kamere za mjerenje brzine kretanja motornih vozila između dva kružna toka i to kružnog toka IX transferzale i kružnog toka Vitkovac. Od kada je izgrađena putna veza između dva kružna toka motorna vozila saobraćaju nepropisnom brzinom i razvijaju brzinu koja nije u skladu sa postavljenim saobraćajnim znakovima. Takođe Vas molim da još jednom razmotrite postavljeni saobraćajni znak na izlazu sa kružnog toka IX transferzale koji je postavljen sa dozvoljenom brzinom do 60 km/h iz razloga što je u neposrednoj blizini kružnog toka i saobraćajnice ulaz u OŠ „Umihana Čuvidina“ i ulaz u Vrtić sa ulice Safeta Zajke gdje je po trenutnoj saobraćajnoj signalizaciji dozvoljeno kretanje vozila brzinom od 60 km/h. Vozila koja ulaze u vrtić i dvoranu OŠ „Umihana Čuvidina“ ugrožena su zbog brzine kojom se saobraća.

8. Potrebno hitno postavljanje usporivača brzine u ulici Adema Buće 195

Tražimo da nadležne općinske službe u što kraćem roku poduzmu sve potrebne korake kako bi se na lokaciji ulice Adema Buće 195, tačnije u dijelu kod visokih stepenica prema ulici Sulje Jahića, postavili usporivači brzine (ležeći policajci).

Ova lokacija već duži niz godina predstavlja ozbiljnu opasnost za pješake, naročito za djecu i starije osobe koje svakodnevno koriste ovu trasu. Građani iz ovog dijela naselja redovno svjedoče saobraćajnim incidentima, a jedna od skoro zabilježenih nesreća koja je mogla imati katastrofalan ishod emitirana je i videozapisom (<https://www.facebook.com/share/v/16XLVCNEmK/>). Manji incidenti, kako ističu stanovnici, dešavaju se gotovo na sedmičnoj bazi.

Uprkos konstantnim apelima građana, do danas nisu poduzeti konkretni koraci, a kao razlog se često navodi potreba za izradom elaborata, dok s druge strane postoje primjeri postavljanja usporivača na drugim lokacijama bez sličnih proceduralnih prepreka, naročito kada je prisutan politički interes.

Zahtijevamo da se hitno poduzmu mjere:

- Izlazak na teren stručnih službi,
 - Donošenje odluke o postavljanju usporivača brzine bez daljih odlaganja,
 - Informisanje javnosti o planiranim koracima i rokovima realizacije.
- Cilj ove inicijative jeste zaštita života i sigurnosti naših sugrađana. Svako dalje odgađanje može imati tragične posljedice, za koje niko neće moći snositi moralnu odgovornost.

9. Inicijativa za hitnu sanaciju fekalnog izljeva i izgradnju kanalizacione mreže u ulici Adema Buće (prema ulici Sulje Jahića visoke stepenice)

Zahtijevamo da nadležne općinske službe bez odlaganja poduzmu konkretne mjere na rješavanju višegodišnjeg problema izlivanja fekalnih voda u ulici Adema Buće, na dijelu koji vodi prema ulici Sulje Jahića. Na ovoj lokaciji, fekalije bez ikakvog kanalizacionog sistema kontinuirano teku niz strmu dionicu ulice pored stambenih objekata i javnih stepenica predstavljajući ozbiljnu prijetnju zdravlju, sigurnosti i osnovnom dostojanstvu stanovnika. Posebno zabrinjava činjenica da se paralelno sa ovim problemom rekonstruisane ulice Sulje Jahića uređuje i asfaltira, uz podršku mjesnog načelnika i službi, dok se najkritičniji i dugogodišnji zdravstveni problem izlivanja fekalija sistemski ignoriše. Ovaj problem ne trpi odgađanja. Radi se o osnovnom ljudskom pravu, pravu na zdravu životnu sredinu. Svaka daljnja šutnja ili birokratsko prebacivanje odgovornosti predstavljala bi samo čin neodgovornosti i otvorenog kršenja osnovnih prava građanima.

10. Inicijativa za sanaciju klupa za odmor u sklopu Osnovne škole “Avdo Smajlović”

Zahtijevamo da nadležne općinske službe u najkraćem roku izvrše sanaciju šest klupa za odmor koje se nalaze u sklopu Osnovne škole “Avdo Smajlović”, odmah pored školskog sportskog igrališta.

Ove klupe svakodnevno koriste učenici, nastavnici, roditelji, kao i građani iz naselja koji dolaze na sportsko igralište. Nažalost, već duže vrijeme su klupe u lošem stanju: dotrajale i nefunkcionalne te direktno utiču na sigurnost djece i svih koji ih koriste za boravak.

S obzirom na to da se radi o javnoj školskoj površini koja je od značaja za lokalnu zajednicu, posebnu ulogu imaju u fizičkom i psihičkom razvoju učenika. Pravovremena sanacija će se direktno odraziti na realizaciju školskih aktivnosti i boravak na otvorenom.

Sanacijom ovih klupa ne samo da će se poboljšati vizuelni izgled školskog dvorišta, već će se učenicima i drugim korisnicima omogućiti siguran i prijatan prostor za odmor i druženje.

11. Inicijativa za hitno postavljanje rešetki na odvodne cijevi u sklopu OŠ “Avdo Smajlović”

Zahtijevamo da nadležne općinske službe hitno izvrše postavljanje zaštitnih rešetki na otvorene odvodne cijevi koje se nalaze u sklopu Osnovne škole “Avdo Smajlović”, tačnije na uglu prema Šehidskom mezarju Buća Potok.

Na navedenoj lokaciji već duži vremenski period nedostaju rešetke, usljed čega su otvori potpuno izloženi i predstavljaju ozbiljnu opasnost za sigurnost učenika. S obzirom na to da se radi o neposrednoj blizini školskog objekta i da se tuda učenici svakodnevno kreću, naročito tokom školskih odmora i u vrijeme dolaska/odlaska iz škole, postoji visok rizik od povrede.

Ova situacija je neprihvatljiva i zahtijeva neodložnu intervenciju. Prevencija je uvijek bolja od reakcije nakon nesreće. Ne postoji opravdanje da se na školskoj površini mjestu koje bi trebalo biti najsigurnije za djecu toleriše ovakav sigurnosni propust.

12. Inicijativa za uređenje zapuštene parcele u ulici Adema Buće (sokak), od broja 26 do spoja s ulicom Zahira Panjete

Zahtijevamo da nadležne općinske službe u najkraćem roku izvrše uređenje zapuštene parcele u ulici Adema Buće (sokak), od broja 26 do spoja s ulicom Zahira Panjete. Radi se o potezu u dužini od otprilike 100 metara, koji se nalazi odmah uz glavnu saobraćajnicu i u neposrednoj blizini stambenih objekata. Ova površina je trenutno u potpunosti zarasla u nisku i visoku divlju vegetaciju, što predstavlja ozbiljan problem za kretanje pješaka, sigurnost stanovnika, kao i opću higijensko-epidemiološku sliku naselja.

Zbog guste šikare i neuređenosti terena, ova lokacija postaje i potencijalno sklonište za napuštene životinje, ali i mjesto za nelegalno odlaganje otpada, što dodatno pogoršava stanje i ugrožava svakodnevni život građana koji žive uz samu parcelu. Ovo je jednostavna, a izuzetno važna intervencija kojom se može značajno unaprijediti bezbjednost i kvalitet svakodnevnog života .

13. Čišćenje divlje šume iza stambene jedinice, ulica Adema Buće 46

Potrebno je dužinom čitavog stambenog objekta očistiti sada bukvalno jednu divlju šumu dužine nekih 30 metara. Trenutno stanje u ljetnom periodu pravi probleme svim stanovnicima ovog stambenog kompleksa, obzirom da je buđenjem prirode i dolaskom toplijih dana ovaj dio leglo raznih insekata i drugih životinja.

14. Potrebna sanacija hair česme posvećene borcima Druge viteške motorizovane brigade "Srce"

Hair česma, podignuta u znak sjećanja i počasti borcima Druge viteške motorizovane brigade Armije Republike Bosne i Hercegovine, predstavlja važno mjesto kolektivnog pamćenja i odavanje poštovanja Šehidima i borcima koji su dali svoje živote za slobodu domovine.

Nažalost, atmosferski utjecaji i nedostatak redovnog održavanja doveli su do toga da je ova spomen česma van funkcije i u jako lošem stanju. Došlo je do vidljivih oštećenja kamene strukture, curenja u vodovodnim instalacijama, kao i estetskih oštećenja natpisa, obilježja...

Sanacija ove česme nije samo tehnički zahvat, to je moralna i društvena obaveza prema onima koji su u najtežim trenucima stali u odbranu naše zemlje. Obnavljanjem ovog simbola sjećanja čuvamo dostojanstvo njihove borbe i šaljemo poruku budućim generacijama o značaju patriotizma, zajedništva i žrtve.

15. Inicijativa za postavljanje kanti za otpatke na sportskom igralištu u ulici Gradačaka

Inicijativa za hitno postavljanje kanti za otpatke na sportskom igralištu u ulici Gradačaka. Do 01.08.2024. godine realizovana je instalacija jednog reflektora, te djelimično uređenje zelene površine. Do dana današnjeg nisu postavljene kante za otpatke. Trenutno stanje na terenu ukazuje na ozbiljan problem. Igralište je svakodnevno prekriveno otpadom, naročito u zonama oko klupa za odmor i uz sportsku podlogu. Ovo ne samo da narušava estetski izgled prostora, već i ukazuje na ozbiljan problem, direktno utiče na higijenske i sigurnosne uslove boravka, posebno za djecu i omladinu koji svakodnevno koriste igralište.

-vijećnica Selma Alić –

1. Podnosim vijećničku inicijativu prema KJKP „Rad“ radna jedinica Novi Grad da se građanima u ulici Hadži-Mustafe Penjave naselje Staro Hrasno obezbijede kante za odlaganje komunalnog i reciklažnog otpada.

Obrazloženje

Građani otpad skupljaju u vreće koje stoje na kapijama individualnih stambenih objekata do samog odvoza istih od strane KJKP „Rad“ što je izvan svih sanitarno higijenskih uslova. Vreće sa otpadom često pokidaju životinje i raznose otpad što predstavlja moguće širenje zaraznih oboljenja.

2. Podnosim inicijativu da se uradi presvlačenje asfalta u ulici Branislava Nušića od broja 85 do glavne kapije Osnovne škole „Aleksa Šantić“ gdje je evidentno oštećenje ulice na više dijelova. Također je potrebno asfaltiranje dijela ulice Ramiza Salčina od broja 95 do glavne kapije Osnovne škole jer asfal uopšte ne postoji na tom djelu ulice. Sve navedene dijelove ulica građani svakodnevno koriste, a naročito je bitna sanacija zbog đaka.

3. Podnosim vijećničku inicijativu prema KJKP Vodovod i Kanalizacija i Općinskom načelniku i službi za investicije Općine Novi Grad da uz zajedničku saradnju izvrše sanaciju vodovodne mreže u ulici Hadži-Mustafe Penjave naselje Staro Hrasno kao i sanaciju već propalog asfalta.

Obrazloženje

U razgovoru sa građanima navedene ulice i uvidom u stanje na terenu, evidentan je dugogodišnji problem oštećenja ulice gdje je asfalt počeo da propada. Dolazi do čestih pucanja vodovodnih cijevi i neadekvatnog saniranja postojećih problema.

4. Zašto služba za Urbanizam nedaje odgovore kada savjeti MZ prosljede zahtjev građana sa svom potrebnom dokumentacijom ili rješenje da li se nešto može realizovati ili ne kako bi građani bili inforisani, a radi se o uklanjanju sadnica koje ometaju svakodnevni život u određenim naseljima. Napominjem da neki čekaju rješenja i više od godinu dana.

-vijećnica Selma Pršeš -

1. Inicijativa za podršku obilježavanju Dana učitelja (5. oktobar 2025)

S obzirom na to da Udruženje učitelja Kantona Sarajevo svake godine obilježava Svjetski dana učitelja (5. oktobar), podnosim inicijativu da ove godine Općina pruži finansijsku i logističku podršku u realizaciji ovog događaja. Kao općina sa najviše stanovnika, škola, prosvjetnih radnika i učenika, imamo posebnu odgovornost da cijenimo i podržimo rad onih koji obrazuju i odgajaju našu djecu. Podrška može biti u vidu osiguravanja prostora za svečanost, pokrivanja dijela troškova organizacije ili drugih oblika pomoći u dogovoru s Udruženjem učitelja. Vjerujem da će ova inicijativa doprinjeti jačanju saradnje između Općine i obrazovnih institucija, kao i afirmaciji učiteljskog poziva koji je temelj svake zajednice.

2. Inicijativa za obnovu klupa i postavljanje kanti za smeće na šetnici u MZ Alipašino polje A2

Polazeći od potrebe da se našim građanima osigura uređen i funkcionalan prostor za odmor i rekreaciju, podnosim inicijativu da se izvrši obnova postojećih klupa i postavljanje novih kanti za smeće na šetnici u mjesnoj zajednici Alipašino polje A2. Trenutno stanje pokazuje da su mnoge klupe dotrajale i neprikladne za upotrebu, dok nedostatak dovoljnog broja kanti za otpatke doprinosi neredu i smanjenoj higijeni javnog prostora. Ovim mjerama poboljšali bismo kvalitet svakodnevnog života naših sugrađana, podstakli očuvanje javne čistoće i učinili šetnicu ljepšim i ugodnijim mjestom za boravak svih generacija.

3. Inicijativa prema KJKP "Rad" za uklanjanje divljih deponija u MZ Alipašino polje A2 i A1

Podnosim inicijativu da KJKP "Rad" poduzme hitne mjere uklanjanja divljih deponija koje su formirane na više lokacija u mjesnim zajednicama Alipašino polje A2 i A1. Ove deponije predstavljaju ozbiljan problem jer narušavaju izgled naših naselja, ugrožavaju javno zdravlje i bezbjednost građana.

4. Inicijativa za postavljanje klupa ispred ambulate Buča Potok

Podnosim inicijativu da se ispred ambulate Buča Potok postave klupe za sjedenje, kako bi građani imali prikladne uslove tokom čekanja na zdravstvene usluge. Ova ambulanta pokriva dvije mjesne zajednice (Dolac I Buča Potok), a njeni kapaciteti su veoma mali u odnosu na broj pacijenata. Zbog toga se često stvaraju gužve, a mnogi naši sugrađani – naročito starije osobe, hronični bolesnici i roditelji s djecom – nemaju gdje sjesti dok čekaju. Postavljanjem klupa pokazali bismo brigu za potrebe pacijenata, olakšali boravak ispred ambulate i učinili ovaj prostor funkcionalnijim.

5. Inicijativa za proširenje niša za smeće u ulici Trebinjska

Podnosim inicijativu da se izvrši proširenje niša za smeće u ulici Trebinjska, budući da postojeći kapaciteti ne zadovoljavaju potrebe građana ove ulice. Zbog nedostatka kontejnera, smeće se odlaže na trotoar, zbog čega se trotoar ne može koristiti, što otežava kretanje pješaka. Proširenjem niša obezbijediće se dovoljno mjesta za kontejnere, urednije odlaganje otpada i nesmetano korištenje trotoara.

-vijećnik Nezir Hadžić-

Podnosim inicijativu da se Osnovna škola Sokolje preimenuje u Osnovna škola Avdo Palić.

Uzimajući u obzir da na prostoru mjesnih zajednica Sokolje i Zabrđe živi veliki dio stanovništva koje potiče sa područja herojske Žepe i da su njihova djeca polaznici navedene škole iznimno je važno da ova škola ponese naziv našeg heroja Avde Palića. Znajući sav njegov doprinos u odbrani područja oko Žepe, te hrabrosti koju je pokazao u tom periodu posebno imajući u vidu i da je naš heroj rahmetli Avdo između ostalog prije rata bio prosvjetni radnik u Han Pijesku. Mi na ovaj način čuvamo uspomenu i naš identitet na prostoru naše lokalne zajednice.

Briga o našim herojima je najoštrij način da se čuva istina, da se čuva identitet i naša historija.

-vijećnik Almir Maslo-

1. Inicijativa za sanaciju oštećenog dijela ograde na mostu na Transferzali Mihaela Šumahera
Podnosim inicijativu za hitnu sanaciju oštećenog dijela ograde na mostu koji se nalazi na Transferzali Mihaela Šumahera

Naime dio zaštitne ograde na mostu je oštećen u znatnoj mjeri nakon saobraćajne nezgode, tj. segment ograde u potpunosti nedostaje što predstavlja ozbiljnu prijetnju za sigurnost pješaka a ponajviše djece. Odsustvo fizičke zaštite povećava rizik od padova naročito u večernjim satima, a i u trenutnoj situaciji kada je bazen na Dobrinji u upotrebi jer je povećana koncentracija pješaka tim dijelom puta
Molim Vas da nadležna služba izvrši obilazak terena i poduzme potrebne korake kako bi se navedeni problem u što kraćem roku otklonio.

2. Inicijativa za postavljanje klupa za odmor u ulici Sulejmana Filipovića

Podnosim inicijativu za postavljanje nekoliko parkovskih klupa sa naslonom na javnoj površini u ulici Sulejmana Filipovića na Dobrinji 5 koja je zaista frekventna i u kojoj živi veliki broj građana treće životne dobi.

Na navedenoj lokaciji trenutno nedostaje par klupa kao mjesto za odmor naših sugrađana

Smatram da bi ova jednostavna intervencija značajno unaprijedila svakodnevni život naših sugrađana i bila bi dobro prihvaćena među stanovnicima.

-vijećnica Armela Humić -

Podnosim inicijativu u ime MZ Aneks i u svoje ime da se u ulici Cazinska kod broja 1 razmotri postavljanje ležećeg policajca radi sigurnosti i zaštite djece, ali i ostalih stanovnika u tom naselju.

Ulica je otvorena s oba kraja, prometna i koristi se kao prolazna saobraćajnica, što dovodi do toga da mnogi vozači kroz nju prolaze neprilagođenom brzinom. Budući da se u neposrednoj blizini nalaze porodične kuće s djecom, zabrinuti smo za sigurnost najmlađih. Radi prevencije saobraćajnih nesreća i zaštite pješaka, posebno djece, predlažemo postavljanje ležećeg policajca ili drugog oblika fizičkog usporivača saobraćaja. Nadamo se da ćete prepoznati ozbiljnost situacije i poduzeti odgovarajuće korake kako bismo spriječili eventualne nesreće i sačuvali sigurnost svih stanovnika.

-vijećnik Bojan Vučković -

1. Povodom zahtjeva građana Vedada Ramovića za finansiranje izgradnje javne česme

Obrazloženje:

Molim za informaciju i ulažem urgenciju prema nadležnoj službi, a u vezi podnesenog zahtjeva stanovnika MZ Staro Hrasno o finansiranju izgradnje česme na lokalitetu rekonstruisanog sportskog igrališta preko puta BTC Merkur na Otoci, te molim da se preduzmu sve neophodne radnje za izdavanje urbanističke, građevinske i ostalih dozvola i neophodnih radnji kako bi se predmetni zahtjev što prije realizovao. Sa ovim zahtjevom se gospodin Ramović obratio Opštini dana 17.07.2025., zaveden pod brojem 666/25.

Od rekonstrukcije gore spomenutog igrališta, kad vremenski uslovi dozvoljavaju, na tom lokalitetu igra se i boravi veliki broj djece, omladine i građana. Jedna stvar koja nedostaje tom lokalitetu jeste javna česma za okrepljenje svih građana koji tu borave.

2. Postavljanje tabli sa nazivima ulica na području cijele opštine Novi Grad Sarajevo

Obrazloženje:

Svjedoci smo da su nazivi ulica kao i brojevi ulaza na velikom broju zgrada kolektivnog smještaja te na privatnim kućama nedovoljno vidljivi i istaknuti, a na velikom broju istih se čak ni ne nalaze. Ovo sve otežava snalaženje u naseljima kako domaćem stanovništvu, a posebno posjetiocima našeg grada i opštine.

Kako bi se ovaj problem riješio te povećao kvalitet boravka u našoj opštini, po uzoru na druge gradove u okruženju i dalje od toga, a također kako je to već uradila i susjedna opština Ilidža, pokrećem inicijativu da se na svakom ulazu u ulicu a također tamo gdje je potrebno i u samoj ulici postavi tabla sa nazivom te ulice. Ovo iziskuje zanemarivo mali trošak u odnosu na korist koja se dobija sa implementacijom iste, jer bi se za postavljanje koristile bandere već postavljenih saobraćajnih znakova i semafora koji se nalaze na ulazima i izlazima iz svake ceste odnosno trošak obuhvata samo izradu ovih tabli i njihovo postavljanje.

Kako to izgleda u praksi, prenosim nekoliko primjera kako je to urađeno u Minhenu i Berlinu.

3. Iscrtavanje i priznavanje dodatnih parking mjesta u ul. Milana Preloga u Hrasnom

Obrazloženje:

U cijelom naselju Staro Hrasno već godinama postoji veliki problem sa nedostatkom adekvatnog broja parking mjesta. Sa jedne strane ovaj problem se javlja zbog velikog povećanja broja vozila kojima raspolaže svaka porodica, a također i povećanim brojem poslovnih prostora čiji uposlenici i korisnici zauzimaju parking mjesta u ovome naselju što dovodi do toga da stanari ovog naselja, kao i svih drugih naselja naše opštine jako teško mogu da nađu slobodno parking mjesto.

U ulici Milana Preloga od broja 3 pa do broja 15, koja se vodi kao dvosmjerna, se stanovnici kao i svi drugi sugrađani, odavno parkiraju u lijevoj traci koja nije iscrtana te kao takva podliježe kažnjavanju zbog nepropisnog parkiranja koje se i desilo nekoliko puta. Radi se o cca. 15-tak parking mjesta itekako neophodnih.

Moja inicijativa ide u pravcu da se ovo parkiranje legalizuje te da se ovaj lijevi dio ulice Milana Preloga od broja 3 do broja 15 prizna kao parking mjesto te da ista budu iscrtana.

Kako se radi o dvosmjernoj ulici, a legaliziranjem parkinga sa lijeve strane, ulica gubi karakteristiku dvosmjerne, a mora biti dvosmjerna jer se radi o „slijepoj“ ulici sa ulaskom i izlaskom iz nje na istoj strano, ovo se može riješiti postavljanjem saobraćajnog znaka sa prvenstvom prolaza na ulazu u ovaj dio ulice kod ulaza br. 3

Prednost prolaska prema vozilima iz suprotnog smjera označava cestovni dio na kojem vozač ima prednost prolaska ispred vozila koja dolaze iz suprotnog smjera. Ovaj znak se najčešće postavlja na uskim cestama, suženjima, mostovima i sličnim dijelovima prometnica gdje dvosmjerni promet ne može nesmetano teći. Ali svakako ovdje saobraćajna struka treba da donese odluku kako se ovo može najjednostavnije riješiti.

4. Postavljanje usporivača prometa u ulici Vrbovska kod broja 139

Obrazloženje:

U ulici Vrbovska kod broja 139 potrebno je postaviti usporivač saobraćaja. Na tom ravnom dijelu ulice na mjestu koje je neposredno u blizini škole, također uz tri sporedne ulice koje se uključuju u ovu glavnu koje nisu dovoljno pregledne, su stanari svakodnevno svjedoci neodgovornih vozača koji tim dijelom prolaze sa velikom brzinom. To se dešava u svako doba dana, od zore do mraka.

5. Fontana na Alipašinom polju – C faza

Obrazloženje:

Molim za informaciju da li postoji namjera, planovi ... za popravkom fontane na Alipašinom polju u C Fazi? Javljaju mi se stanari ovog naselja sa ovim pitanjem jer im ova fontana puno znači posebno u vrućim ljetnim mjesecima gdje se mogu malo rashladiti sjedeći pored nje, a također ista puno znači i pticama koji se na njoj mogu rashladiti.

-vijećnica Hana Keč -

1. POkrećem inicijativu za postavljanje usporivača brzine u ulici Aleja Bosne Srebrene u blizini J.U. "Gerontološki centar".

O B R A Z L O Ž E N J E

Kantonalna javna ustanova „Gerontološki centar“ Sarajevo se već obraćala Ministarstvu saobraćaja KS, a onda i Služba za investicije i komunalne poslove Općine Novi Grad sa ovom inicijativom, i dobili su odgovor nadležne službe da je predmetni zahtjev evidentiran, te će se realizacija istog razmotriti u okviru programa obnove saobraćajne signalizacije shodno stepenu prioriteta.

Kantonalna javna ustanova „Gerontološki centar“ Sarajevo je ustanova socijalne Skupštine Kantona Sarajevo, koja pruža starim, hronično bolesnim, invalidnim, iznemoglim i drugim osobama, socijalne, zdravstvene i servisne usluge primjenom institucionalnih i vaninstitucionalnih oblika zaštite.

Dio Grada u kome su smješteni objekti „Gerontološkog centra“, u ulici Aleja Bosne srebrene, je naselje sa velikim uličnim prometom vozila, veoma živo i veoma opasno po korisnike „Gerontološkog centra“. Zbog pojačanog prometa vozila i veoma često neprimjerene voćnje naši korisnici su, kao pješaci, stalno izloženi opasnosti od saobraćajnih nezgoda, što je jasno upozorenje za hitno poduzimanje određenih mjera.

Kao jednu od mogućih mjera, kojima bi se usporio saobraćaj pored „Gerontološkog centra“ i ublažile moguće posljedice nepoštivanja saobraćajnih pravila, predlažemo postavljanje usporivača brzine tzv. ležećih policajaca na cesti ili nekog drugog adekvatnog posebnog objekta na cesti.

Napominjemo da se u ovoj ulici, osim „Gerontološkog centra“, nalazi i Javna ustanova „Centar za slijepu i slabovidnu djecu i omladinu“, što je još jedan razlog više da se odgovarajućim mjerama uspori saobraćaj.

2. Pokrećem inicijativu za zamjenu oglasne ploče ispred zgrade Opštine Novi Grad Sarajevo

O B R A Z L O Ž E N J E

Na zelenoj površini ispred zgrade Opštine Novi Grad Sarajevo se nalazi oglasna ploča na kojoj je bila mapa opštine. Uslijed dijelovanja atmosferskih prilika mapa je otečena do neprepoznatljivosti. Predlažem da se ista zamjeni novom, modernijom i da mapa bude interaktivna te da posjetioci mogu saznati više o opštini, kulturnim i turističkim sadržajima i dešavanjima na području naše opštine.

3. Pokrećem inicijativu za se izvrši ozelenjavanje i pošumljavanje slobodnih zelenih javnih površina i prostora između objekata kolektivnog stanovanja.

O B R A Z L O Ž E N J E

Zelene površine u značajnoj mjeri mogu da doprinesu i poboljšanju kvaliteta zraka (i pored ostalih koristi). Svako rastinje ima različitu moć apsorpcije zagađujućih materija u zraku. Tzv. urbana vegetacija je često koncentrisana u parkovima i vrtovima, gdje je koncentracija PM10 relativno niska. Pored ostalih koristi (smanjenje toplotnih otoka, biodiverzitet) sadnja vegetacije bliže zagađenijim područjima imat će veće efekte. Sađenje drveća je često korištena mjera za smanjenje koncentracije čestične tvari u zraku. Zasađivanjem jedne četvrtine zemljišta drvećem, prosječna koncentracija PM10 se može smanjiti za 2 do 10%.

U ovim mjerama neophodno je konsultovati stručnjake sa Šumarskog fakulteta i odsjeka za biologiju Prirodno-matematičkog fakulteta Univerziteta u Sarajevu kako bi se utvrdilo koje biljne vrste imaju najveće kapacitete apsorpcije prašine i drugih štetnih materija, a kojima klimatske i druge odlike sarajevske kotline omogućavaju optimalan razvoj.

4. Upućujem pitanje: Zašto radnici J.P. Lokoma službenim vozilom, dovoze otpad/smeće i odlažu ga u kontejnere u naselju.

O B R A Z L O Ž E N J E

U nastavku su fotografije snimljenje od strane građana koji su snimili vozaca automobila J.P. Lokom kako itovara vreće smeća u kontejnere u naselju. Ovo nije prvi put da su uočili ovo, ali prvi put je uslikano. Interesuje nas da li je to praksa da prilikom obavljanja poslovnih aktivnost odlažu smeće/otpad u naselje ili je uposlenik u privatne svrhe ovo radio?

5. U ime udruženja Centar za razvoj omladinskog aktivizma CROA prenosim inicijativu- Inicijativa za izmjenu i unapređenje kriterija za dodjelu općinskih stipendija, u cilju pravičnijeg i sveobuhvatnijeg modela stipendiranja.

Opis problema:

Trenutni sistem stipendiranja u Općini Novi Grad Sarajevo, iako formalno naveden kao stipendija za učenike i studente, u praksi se prvenstveno zasniva na imovinskom statusu porodice, odnosno kriteriju da primanja po članu domaćinstva ne smiju prelaziti 600,00 KM. Ovakav pristup, iako formalno otvoren za sve učenike i studente, u suštini predstavlja oblik socijalne pomoći, a ne nagrade za trud, rad i postignuća mladih.

Prema podacima Saveza samostalnih sindikata Bosne i Hercegovine, sindikalna potrošačka korpa za četveročlanu porodicu za mjesec maj 2025. godine iznosi 3.178,40 KM. Kada se navedeni imovinski prag primijeni na četveročlane porodice ($4 \times 600 \text{ KM} = 2.400 \text{ KM}$), jasno je da je prag za dodjelu stipendije za 778 KM niži od iznosa osnovnih troškova života, čime se direktno ograničava pristup stipendijama velikom broju učenika i studenata iz porodica koje nisu socijalno ugrožene, ali ni blizu privilegovane.

U konkursu je navedeno da postoje izuzeci od ovog pravila, što smatram izuzetno pohvalnim, ali moja inicijativa se odnosi na molbu nadležnima za uvođenjem stipendije koja će se odnositi samo na nadarene učenike/studente, sportiste, ili učenike/ studente koji imaju odličan uspjeh, te koji pokazuju izuzetan talenat i takmičarske rezultate u različitim granama sporta i umjetnosti, pri čemu se neće gledati primanje članova porodice.

Ja sam učenica Druge gimnazije u Sarajevu, sa prosjekom 5.0, reprezentativka Bosne i Hercegovine u ritmičkoj gimnastici, nacionalni sudija i aktivna učesnica u mnogim edukativnim, volonterskim i sportskim aktivnostima. Trenutno volontiram u organizaciji Centar za razvoj omladinskog aktivizma CROA, te uz njihovu podršku, upućujem ovu inicijativu. Iako sam više puta aplicirala za stipendiju Općine Novi Grad, uvijek sam bila odbijena isključivo zbog toga što primanja moje porodice ne spadaju ispod propisanog imovinskog praga.

Ciljevi inicijative:

1. Redefinisati sistem bodovanja stipendija tako da uključi:

- akademski uspjeh
- sportska i umjetnička postignuća
- vannastavni angažman
- socio-ekonomski status

2. Uvesti jasne kategorije stipendija:

- stipendije za nadarene učenike i studente
- stipendije za sportiste
- stipendije za socijalno ugrožene

3. Osigurati transparentnost konkursa:

- jasan prikaz bodovanja
- objava minimalnog broja bodova potrebnih za ostvarenje prava

4. Uskladiti praksu sa drugim općinama Kantona Sarajevo koje već prepoznaju potrebu za podrškom izvrsnosti i različitim oblicima uspjeha.

Poređenje sa drugim općinama:

ostvaruju pravo na dodjelu stipendije-direktan prolaz bez obzira na ukupan broj bodova prikupljen na osnovu drugih kriterija Pravilnika.

- Naziv konkursa: „Javni poziv za dodjelu stipendija nadarenim učenicima srednjih škola i studentima“
- Ovakav naziv konkursa jasno odražava namjeru općine da nagradi znanje, rad i postignuća. S druge strane, u Općini Novi Grad naziv konkursa ne naglašava ni da se radi o stipendijama za nadarene učenike, niti iskreno reflektuje da su u pitanju socijalne stipendije, iako se glavni kriterij svodi upravo na imovinski status domaćinstva. Kada se uzme u obzir visina tog praga (600 KM po članu porodice), koji je znatno ispod sindikalne potrošačke korpe, jasno je da ova stipendija nije ni „obična“, već zapravo predstavlja vid socijalne pomoći — bez da je to jasno naznačeno u samom nazivu konkursa.

Općina Ilidža:

Općina Ilidža također razdvaja javne pozive za stipendiranje učenika: konkurs za stipendiranje izvrsnih učenika i studenata, te konkurs sa navedenim iznosom primanja članova domaćinstva.

Učenici moraju imati minimalni prosjek od 4,90 (što je viši prag od većine drugih općina) i primjerno vladanje, što dodatno naglašava važnost cjelokupnog ponašanja i posvećenosti učenika.

•Studenti se dijele po grupacijama:

oTehnički i medicinski fakulteti: 7,50 prosjek

oOstali fakulteti: 8,50 prosjek

Ova inicijativa poziva na pravičniji, inkluzivniji i razvojno orijentisan model stipendiranja koji će prepoznati raznolikost uspjeha među mladima i ulagati u njihov potencijal.

-vijećnica Emina Hasanović -

1. Siguran put do škole – hitan prioritet Općine Novi Grad

Podnosim hitnu inicijativu kojom zahtijevam da siguran put djece od kuće do škole postane prioritet u djelovanju općinskih službi, planiranju budžeta i komunalnim intervencijama.

U našoj općini, više lokacija u blizini osnovnih škola (uključujući OŠ "Aleksa Šantić", OŠ "Ćamil Sijarić" i druge) predstavljaju kritične tačke .

Pozivam općinske službe da bez odlaganja:

1. Identifikuju i mapiraju najkritičnije dionice oko svih osnovnih škola na području općine Novi Grad

2. Iscrtavanje pješačkih prelaza u blizini osnovnih škola posebnom bojom

Standardni bijeli pješački prelazi često se ne razlikuju od ostalih i ne privlače pažnju vozača u mjeri koja je potrebna. Predlažem da se, po uzoru na evropske gradove, u blizini škola koriste fluorescentne i kontrastne boje za bilježavanje prelaza (npr. crvena ili narandžasta), kako bi se jasno signaliziralo da se vozilo približava školskoj zoni i da je potrebna dodatna pažnja.

3. Distribucija reflektujućih/svjetlećih traka za školsku djecu

Predlažem da općina, u saradnji sa školama, obezbijedi reflektujuće trake ili prsluke koje bi učenici nosili na torbama ili rukavima ili nogvicama – posebno tokom jesenjih i zimskih mjeseci kada je vidljivost smanjena. Ova praksa je zastupljena u nekim evropskim državama gdje lokalne uprave ili škole na početku školske godine dijele reflektirajuće oznake djeci kao vid mjere preventivne zaštite.

Cilj je da svako dijete bude uočljivo vozačima na većoj udaljenosti, čime se smanjuje rizik od nesreća čak i u uslovima smanjene vidljivosti.

4. Ukoliko postoji mogućnost implementacije svjetleće signalizacije u školskim zonama

Na kritičnim dionicama u blizini škola (posebno na mjestima gdje je smanjena vidljivost ili veća brzina vozila), potrebno je postaviti svjetlosnu signalizaciju koja upozorava vozače da ulaze u zonu kretanja djece. Ova rješenja uključuju:

•Trepćuće žute svjetlosne znakove,

•senzorske pješačke prelaze koji aktiviraju svjetla kada se pješak približi,

•te upozoravajuće table sa simbolima djece

Ovakva oprema značajno povećava šanse da vozači reaguju na vrijeme i smanje brzinu.

Siguran put do škole nije pitanje komfora, već osnovnog prava svakog djeteta i odgovornosti nas kao lokalne zajednice. Očekujem da se ova inicijativa razmatra prioritarno i uključi u planove djelovanja već prije početka naredne školske godine.

2. Postavljanje usporivača saobraćaja u ulici Ramiza Salčina (brojevi 21 i 61)

Podnosim inicijativu za postavljanje usporivača saobraćaja u ulici Ramiza Salčina, u neposrednoj blizini brojeva 21 i 61. Ovaj zahtjev se već nalazi na listi prioriteta MZ Saraj Polje. U blizini navedenih lokacija nalazi se osnovna škola, a saobraćaj u ovoj ulici je izuzetno frekventan. Vozila, uključujući i teretna, često prolaze velikom brzinom, dok su trotoari uski i neadekvatni za sigurnu kretanju pješaka – posebno djece. Molim vas da dostavite informaciju o mogućnosti i planiranom terminu realizacije ovog zahtjeva, te apelujem da se mjere zaštite pješaka provedu u što skorijem roku.

3. Iscrtavanje pješačkog prelaza – ulica Adija Mulabegovića

Podnosim inicijativu za hitno iscrtavanje pješačkog prelaza u ulici Adija Mulabegovića, na dijelu puta koji vodi ka OŠ Aleksa Šantić i obližnjem igralištu.

Put do škole je izrazito nesiguran, a školu pohađa veliki broj učenika. Molim da se na ovoj lokaciji što prije obezbijedi pješački prelaz i odgovarajuća signalizacija, u cilju zaštite djece i svih pješaka.

4. Uređenje trotoara i regulacija kratkotrajnog zaustavljanja – Trg grada Prato i ulica Branislava Nušića

Podnosim inicijativu za uređenje trotoara i uvođenje reda u korištenju javnog prostora na sljedećim lokacijama:

- Trg grada Prato (preko puta pošte)
- Ulica Branislava Nušića (kod biroa za nezaposlene osobe)

Na ovim frekventnim tačkama, svakodnevno se susrećemo sa nepropisnim parkiranjem vozila na trotoarima, što ozbiljno ugrožava sigurnost i slobodu kretanja pješaka, naročito majki s djecom u kolicima, osoba s invaliditetom i starijih građana.

Predlažem sljedeća tri konkretna rješenja:

1. Postavljanje viših ivičnjaka (12–15 cm) na kritičnim dijelovima trotoara, kako bi se fizički spriječilo penjanje vozila na pješačku zonu i osigurao nesmetan prolaz pješaka;
2. Formiranje male, jasno označene zone za kratkotrajno zadržavanje vozila (maksimalno 2–3 mjesta, uz vremensko ograničenje do 5 minuta), isključivo za potrebe dostave ili brzog iskrcaja putnika, kako bi se izbjegla zloupotreba prostora.

Ova kombinacija mjera omogućila bi bolje funkcionisanje prostora, zaštitu pješaka i uvođenje reda, bez uskraćivanja minimalne fleksibilnosti za vozače.

Molim da se inicijativa uputi nadležnim službama i uključi u planove uređenja komunalne infrastrukture na području MZ Dobrinja A.

5. Rješavanje problema oborinske odvodnje na putu prema osnovnoj školi „Osman Nuri Hadžić“

Podnosim inicijativu za hitno rješavanje problema oborinske odvodnje na pješačkoj stazi. Naime, zbog pogrešno postavljenog slivnika ili neadekvatnog asfaltiranja prilaznog puta, u vrijeme kišnih perioda stvara se ogromna lokva koju je teško zaobići. Lokva se nalazi na pristupnom putu koji vodi do osnovne škole. Isti pristupni put koriste građani krećući se ka trolejbuskoj stanici.

Tokom kišnih perioda na zbog nakupljenog blata i klizave podloge, česti su padovi, a djeca često nemaju mogućnost da lokvu zaobiđu ili preskoče. Iako se trenutno problem nije prisutan. U prilogu šaljem slike stanja u kišnom periodu.

Molim vas da se izvrši terenski pregled i pokrene proces sanacije, kako bi se spriječilo stvaranje lokve i osigurala bezbjednost učenika i građana.

Napominjem da je ovaj problem već 2021. prijavljen MZ Dobrinja B. Do danas nije došlo do konkretne realizacije, te ponovo apelujem da se ovaj problem ozbiljno razmotri i da se provjeri da li je, i zbog čega nije, realizovan kroz prethodne budžetske godine.

6. Inicijativa za vraćanje drvenih obloga na kamene klupe – šetnica Bulevar branilaca Dobrinje

Podnosim inicijativu za vraćanje drvenih obloga na kamene klupe na šetnici u gornjem dijelu Bulevara branilaca Dobrinje, na potezu između ulica Lava Tolstoja i Kunovska. Drvena površina je znatno ugodnija za sjedenje, posebno starijim sugrađanima kojih u ovom dijelu naselja ima mnogo.

7. Uređenje javne parkovske površine

Podnosim inicijativu za uređenje javne površine iza stambene zgrade na adresi Trg međunarodnog prijateljstva 18. Prostor koji se trenutno koristi kao park je zapušten, neodržavan i bez osnovnih sadržaja prilagođenih djeci i građanima. Smatram da je potrebno njegovo hitno uređenje kako bi bio siguran, funkcionalan i ugodan za svakodnevno korištenje.

8. Inicijativa za institucionalno obilježavanje 31. maja u Kantonu Sarajevo

U ime građanki i građana, te u duhu zajedničkog suočavanja s prošlošću i njegovanja kulture sjećanja, predlažemo da Općinsko vijeće Novi Grad predloži inicijativu prema Vladi Kantona Sarajevo da se 31. maj na području Kantona Sarajevo institucionalno obilježava kao dan s posebnim pijetetom prema žrtvama ratnih zločina u Prijedoru.

Naime, 31. maja 1992. godine u Prijedoru je preko lokalnog radija izrečena prisilna naredba da svi nesrpski stanovnici obilježe svoje domove bijelim čaršafima i nose bijele trake, što je bio znak početka sistematskog progona, masovnih ubistava i zatočenja u logorima poput Omarske, Keraterma i Trnopolja.

Iako ovaj datum do danas nije zvanično obilježen u Kantonu Sarajevo, smatramo da je važno da se na ovaj dan iskaže dostojanstven pijetet i poštovanje prema žrtvama i njihovim porodicama.

Predlažemo da se na taj dan ne održavaju javne manifestacije kulturno-zabavnog i sportskog karaktera na području Kantona Sarajevo, kako bi se sačuvala ozbiljnost i dostojanstvo ovog značajnog datuma.

Pozivamo Općinsko vijeće da:

Usvoji ovu inicijativu,

- Uputi službeni dopis Vladi Kantona Sarajevo s prijedlogom institucionalnog obilježavanja 31. maja na način da se na taj dan suzdrže od održavanja manifestacija kulturno-zabavnog i sportskog karaktera.

Vjerujemo da ovakva odluka može doprinijeti izgradnji kulture sjećanja i međusobnog poštovanja u našem društvu.

9. Urgentna podrška za imenovanje javnog prostora po Aidi Buturović

Poštovane kolegice i kolege,

Predlažem da Općinsko vijeće Novi Grad pokrene urgenciju prema Gradskom vijeću Sarajeva da se što prije donese odluka o imenovanju trga, ulice ili škole u čast Aide Buturović– hrabre bibliotekarke Nacionalne i univerzitetske biblioteke BiH, koja je, nakon što je zajedno sa kolegama pokušavala da spasi što veći broj dragocjenih rukopisa iz zapaljene Vijećnice u noći između 25. i 26. augusta 1992. godine, izgubila život. Aida Buturović je simbol predanosti znanju, kulturi i ljudskoj hrabrosti – njeno ime zaslužuje trajno obilježje u našem gradu.

Njena hrabrost, nesebična posvećenost znanju i doprinos očuvanju kulturne baštine predstavljaju vrijednost koju naša zajednica mora poštovati i trajno zabilježiti u javnom prostoru.

Molim da se ova inicijativa uputi službenim putem Gradskom vijeću sa zahtjevom za prioritarno razmatranje imenovanja po Aidi Buturović.

10. OBJAVLJIVANJE VIJEĆNIČKIH ZADUŽENJA PO MJESNIM ZAJEDNICAMA

U cilju jačanja transparentnosti rada Općinskog vijeća i unapređenja komunikacije s građanima, podnosim inicijativu da se javno objave vijećnička zaduženja po mjesnim zajednicama.

Predlažem da se na zvaničnoj web stranici Općine, oglasnim pločama mjesnih zajednica i drugim dostupnim kanalima jasno navede koji općinski vijećnik ili vijećnica je zadužen/a za koju mjesnu zajednicu, kako bi građani znali kome se mogu direktno obratiti za informacije, prijedloge i inicijative koje se tiču njihove lokalne sredine.

Ova praksa bi doprinijela:

- većem povjerenju građana u rad vijećnika i vijeća,
- lakšem protoku informacija između građana i općinskih struktura,
- jačanju odgovornosti izabranih predstavnika prema zajednici,

-efikasnijem rješavanju problema u lokalnim sredinama.

11. SANACIJA PJEŠAČKOG DIJELA MOSTA MALEZIJSKO-BOSANSKOHERCEGOVAČKOG PRIJATELJSTVA (BOSMALOVOG MOSTA)

Obraćam u ime građana koji su izrazili zabrinutost zbog lošeg i nesigurnog stanja pješačkog dijela Mosta malezijsko-bosanskohercegovačkog prijateljstva (tzv. Bosmalovog mosta).

Na mostu se nalazi veća oštećena površina s vidljivom armaturom i značajnim pukotinama koje nemaju završnu obradu. Takvo stanje predstavlja direktnu opasnost za sve pješake, a naročito za ranjive kategorije – osobe s invaliditetom, roditelje s djecom u kolicima, starije osobe, kao i djecu koja pohađaju JU OŠ "Osman Nakaš", koja se nalazi u neposrednoj blizini.

Građani ističu da ovaj problem postoji već duži vremenski period, bez ikakvih naznaka sanacije, i s pravom očekuju konkretnu reakciju nadležnih službi.

Molim vas da ovu inicijativu uvrstite u razmatranje u skladu sa nadležnostima, te da se građanima dostavi povratna informacija.

12.. INFORMISANJE O RADOVIMA NA ZADNJOJ ETAPI ALEJE LIPA (MZ STARO HRASNO)

Obraćam se povodom upita grupe građana Mjesne zajednice Staro Hrasno, koji izražavaju zabrinutost zbog dužeg zastoja u realizaciji zadnje etape radova na popločanju Aleje lipa.

Prema informacijama građana, radovi na pomenutoj etapi traju već nekoliko mjeseci bez ikakvog pomaka, što izaziva opravdanu zabrinutost zbog neuređenog prostora i narušene funkcionalnosti tog dijela Aleje.

Molim nadležne službe da dostave zvanične informacije o trenutnom statusu radova, razlozima za zaustavljanje i planiranim koracima za nastavak i završetak ove etape. Također, predlažem da se izvrši što skorija organizacija i aktivacija radova kako bi se što prije osigurala urednost i sigurnost prostora za građane.

13. Podrška uređenju dvorišta Osnovne škole "Osman Nuri Hadžić" kroz međuinstitucionalnu saradnju

U ime građanki i građana koji svakodnevno koriste prostor u okolini Osnovne škole "Osman Nuri Hadžić", predlažem da Općina Novi Grad:

1.izvrši uvid u trenutno stanje dvorišta škole,

2.te da, u saradnji s nadležnim razmotri mogućnosti za ozelenjavanje, sadnju stabala i postavljanje adekvatne opreme za boravak djece na otvorenom prostoru.

Iako uređenje školskog dvorišta nije direktno u nadležnosti općine, vjerujem da postoji prostor za djelovanje kroz da se isto realizuje.

Zelene površine i kvalitetan vanjski ambijent oko škole doprinose ne samo zdravlju i sigurnosti djece, već i kvaliteti života cijele zajednice. U tom smislu, predlažem da se ova inicijativa uputi nadležnim službama radi otvaranja dijaloga i pokretanja konkretnih aktivnosti u budućem periodu.

-vijećnik Almir Džindo-

Broj održanih sjednica svih radnih tijela za period januar- juli 2025 sa usporednim pokazateljima 2024 i 2023 godine , za isti period, i usporedba sa izdvojenim novčanim sredstvom građana općine NG

-vijećnik Abel Baltić –

1. Pokrećem inicijativu da se sufinansira projekat modernizacije učionica tehničkog obrazovanja u OŠ „Fatima Gunić“ kroz nabavku industrijskog edukativnog robota i CNC glodalice.

2. Pokrećem inicijativu da se proširi mreža postavljanja reciklomata na području naselja Dobrinja i Alipašino polje, kao i na drugim područjima Općine.

-vijećnici Nejra Džanko Zukobašić i Enes Husejnović-

1. Inicijativa za postavljanje stacioniranih radara u ulici Džemala Bijedića

Ispred Savjeta mjesne zajednice „Alipašin Most III“ podnosimo inicijativu prema Ministarstvu unutrašnjih poslova Kantona Sarajevo za postavljanje stacioniranih radara u ulici Džemala Bijedića, na dionici od broja 160 do IX transverzale.

Obrazloženje:

Naime, nakon proširenja navedene saobraćajnice, već duži vremenski period primjećena su motorna vozila koja se kreću brzinom većom od dozvoljene. Poseban problem predstavljaju večernji sati, kada se na ovom lokalitetu okupljaju tzv. „trkači“, koji ne samo da ugrožavaju sigurnost saobraćaja vozeći velikom brzinom, već i narušavaju javni red i mir stanovnika okolnih naselja, u kojima se nalazi više od 1.500 stambenih jedinica. Na predmetnoj lokaciji već je zabilježeno nekoliko saobraćajnih nezgoda, a učesnici nelegalnih trka su, izljetanjem s kolovoza, nanosili štetu zelenim površinama i saobraćajnoj signalizaciji. S obzirom na sve navedeno, smatramo da je postavljanje stacioniranih radara nužno radi povećanja sigurnosti svih učesnika u saobraćaju i očuvanja javnog reda i mira.

2. Inicijativa za inspekcijski nadzor dječijih igrališta na području MZ „Alipašin Most III“

Ispred Savjeta mjesne zajednice „Alipašin Most III“ upućujemo inicijativu Službi za inspekcijske poslove s ciljem izlaska na teren i utvrđivanja činjeničnog stanja dječijih igrališta na sljedećim lokacijama:

1. Dječije igralište u ulici Džemala Bijedića 160, naselje Miljacka

Poseban akcenat stavljamo na oštećenje mobilijara, posebno dječijeg tobogana, kao i na stanje sigurnosne ograde sportskog igrališta koja se nalazi na ivici krova garaža. Ograda predstavlja ozbiljnu opasnost od pada djece s visine od oko 1,6 metara.

2. Dječije i sportsko igralište u naselju Nova Otoka

Potrebno je izvršiti uvid u stanje sigurnosne ograde sportskog igrališta, koja je znatno oštećena i predstavlja prijetnju sigurnosti djece koja svakodnevno koriste ovaj prostor.

Napominjemo da su navedena igrališta izgradili investitori, koji su, s obzirom na to da se zemljište i dalje vodi kao njihovo vlasništvo i da je namijenjeno za javnu upotrebu, dužni redovno održavati navedene sadržaje.

Molimo da se, u skladu s nadležnostima, poduzmu odgovarajuće mjere kako bi se osigurala sigurnost djece i očuvala funkcionalnost javnih prostora.

3. Vijećničko pitanje

Postavljamo vijećničko pitanje Službi za urbanizam, stambene, imovinsko - pravne geodetske poslove i katastar nekretnina: da li dječije igralište u naselju Miljacka u mjesnoj zajednici Alipašin Most III ima upotrebnu dozvolu?

-vijećnica Nejra Džanko Zukobašić-

1. Podnosim vijećničko pitanje prema Ministarstvu za boračka pitanja Kantona Sarajevo, kada je bila posljednja isplata i kada će se nastaviti refundacija troškova dženaza i sahrana za borce Armije Bosne i Hercegovine?

2. Podnosim inicijativu prema Službi za investicije i komunalne poslove za izradu okvirne finansijske procjene koliko koštaju vijećničke inicijative prema ovoj službi? Da li vijećnici prate budžet ili na pola budžetske godine prave nove budžetke stavke?

Molim Vas da uzmete u obzir sve navedeno sa 8. sjednice Općinskog vijeća Novi Grad Sarajevo te napravite finansijski okvir i konstrukciju kako bi se prema navedenim podacima mogli usmjeriti ka aktivnostima iz kojih će rezultirati pravi vijećnički angažmani.

3. U kojoj je fazi nabavljanje ultrazvučnog aparata sa tri sonde koji je planiran u budžetu za 2025. godinu prema JU Zavod za materinstvo Kantona Sarajevo?

-Vijećnik Bajro Biber -

Inicijativa za izgradnju žičare prema brdu Žuč

U skladu sa svojim ovlaštenjima kao vijećnik Općinskog vijeća Novi Grad, podnosim inicijativu kojom predlažem da se pokrenu aktivnosti na ispitivanju mogućnosti izgradnje žičare prema brdu Žuč, u cilju poboljšanja pristupa ovom značajnom lokalitetu, te njegove bolje integracije u turističku i rekreativnu ponudu Općine Novi Grad i Grada Sarajeva.

Brdo Žuč, smješteno iznad Sarajeva, a u sastavu naše općine, imalo je izuzetno važnu stratešku ulogu tokom ratnih godina, predstavljajući simbol otpora i borbe. Danas se na brdu nalazi spomenik „Krila slobode“, koji svjedoči o tim vremenima. Osim historijskog značaja, brdo Žuč posjeduje izvanredan potencijal za razvoj turizma, rekreacije i edukacije, sa jedinstvenim panoramskim pogledom na Sarajevo i okolicu.

Međutim, teška pristupačnost ovog lokaliteta predstavlja prepreku njegovom punom iskorištavanju. Stoga smatram da bi izgradnja žičare značajno doprinijela pristupačnosti, atraktivnosti i promociji ovog područja, te istovremeno poslužila kao pokretač novih inicijativa u oblasti turizma i očuvanja kulturno-historijskog naslijeđa.

Molim da se ova inicijativa uputi nadležnim službama Općine na razmatranje, te da se, u skladu sa mogućnostima, započne izrada analize i idejnog rješenja za realizaciju navedenog projekta.

-vijećnik Mirza Memišević -

1. Organizacija grupe za Marš mira 2026. godine

Predlažem da Općina Novi Grad Sarajevo svake godine organizuje i podrži grupu građana za učešće u Maršu mira (Nezuk–Potočari). Potrebno je formirati organizacioni tim, omogućiti logističku podršku i uključiti mlade kroz edukaciju i javni poziv.

2. Povećanje sigurnosti na raskrsnici između B i C faze – Alipašino Polje

Tražim da Općina Novi Grad Sarajevo pokrene inicijativu prema Direkciji za puteve KS i MUP KS u cilju poboljšanja sigurnosti na raskrsnici između B i C faze. Udesi su česti, a pješaci ugroženi. Potrebna je hitna analiza i uvođenje rješenja koja će povećati stepen sigurnosti učesnika u saobraćaju.

3. Postavljanje ležećih policajaca u Boljakovom Potoku – raskrsnica Šikala i Spahića

Podnosim inicijativu za postavljanje dva ležeća policajca na raskrsnici ulica Smaila Šikala i Senada Spahića, naselje Boljakov Potok. Na ovoj lokaciji se redovno dešavaju saobraćajne nesreće, uključujući i smrtni slučaj pješaka. Raskrsnica je nepregledna, a brzina kretanja vozila visoka.

Uklanjanje pasa lualica kod OŠ 'Skender Kulenović' (Dobrinja – Merkator)

4. Podnosim inicijativu za hitno uklanjanje pasa lualica u blizini Osnovne škole 'Skender Kulenović', Dobrinja. Jedno dijete je napadnuto i zbrinuto u hitnoj pomoći. Ova lokacija je u blizini škole i frekventna, te je neophodno hitno djelovati u cilju zaštite djece i građana.

5. Dezinsekcija u naselju C Faza – Trg Nezavisnosti (kod Biblioteke)

Pokrećem inicijativu kojom zahtijevam da se izvrši hitna dezinsekcija naselja C Faza – Trg Nezavisnosti, Geteova i Bosanska ulica. Građani su prijavili povećan broj žohara i drugih insekata, što ukazuje na moguće izostavljanje ovog područja u prethodnim ciklusima tretmana.

Fontana u C fazi – Trg Nezavisnosti nije u funkciji

6. Podnosim inicijativu kojom tražim da Općina ispita razlog zašto fontana na Trgu u C fazi (Alipašino Polje) nije u funkciji, te da se pokrene njena hitna sanacija i vraćanje u upotrebu kao javnog sadržaja. Sanacija šahta u ulici Sulejmana ef. Musića 2

7. Pokrećem inicijativu kojom zahtjevam od preduzeća KJKP 'ViK' d.o.o. Sarajevo hitnu intervenciju i sanaciju kvarova u šahtu u ulici Sulejmana ef. Musića broj 2. Na navedenoj lokaciji već od oktobra traje kvar usljed kojeg se u šahtu svakodnevno zadržava voda koja se ručno iscrpljuje. Voda ima neugodan miris i predstavlja sanitarno-epidemiološki rizik. Iako je problem više puta prijavljiv, reakcija izostaje.

-vijećnik Jasmin Smječanin-

Podnosim inicijativu da se ubrza sanacija ulice Smaila Šikala u Boljakovom potoku s obzirom na probleme kretanja pješaka i saobraćaja motornih vozila te da se ubrza završetak kružnog toka na devetoj transferzali prije početka školske godine

-vijećnica Emina Juzbašić –

Podnosim inicijativu prema KJKP "Rad" da dostave informaciju zašto još uvijek nisu postavljeni nikakvi oblici kontejnera u ulici Hajrudina Šabanije, Dobrinja. Kontejneri su bili na A transversali, te su isti sklonjeni, s čime je izazvan ogroman problem i nezadovoljstvo kod stanovnika pomenute ulice, tačnije stanara zgrade. Također određen broj ljudi i pored toga što više kontejneri ne postoje, odlažu otpad na pomenuto mjesto i time se stvara još gore stanje i ugled ulice kojom prolaze s aerodroma posjetioци našeg grada. U razgovoru sa stanarima kontejneri bi se mogli postaviti na ulazu u ulicu Branislava Nušića (na trotoar) tačnije isključenje sa A transversale gdje se nalazi i pješački most koji povezuje ulicu Hajrudina Šabanije i Branislava Nušića.

Bilo je informacija mogućnosti postavljanja zvona i nadam se da još uvijek postoje planovi za takvo nešto.

-vijećnik Damir Filipović –

Inicijativu za uspostavu javno dostupnog registra vijećničkih pitanja i inicijativa na službenoj web stranici Općine

Obrazloženje:

U cilju jačanja transparentnosti rada Općinskog vijeća, unapređenja komunikacije s građanima i povećanja odgovornosti izabranih predstavnika, pokrećem inicijativu da se na službenoj web stranici Općine formira registar vijećničkih pitanja i inicijativa, koji će sadržavati sljedeće informacije:

- Ime i prezime vijećnika koji je postavio pitanje ili pokrenuo inicijativu,
- Datum postavljanja pitanja / pokretanja inicijative,
- Tekst pitanja / inicijative,
- Nadležna služba ili organ kojem je proslijeđeno,
- Status (npr. u obradi, odgovoreno, realizovano, odbijeno) – sa vidljivim odgovorima,
- Datum i sadržaj odgovora / informacije o poduzetim radnjama.

Registar bi bio organizovan po vijećnicima, s mogućnošću pretrage po temama, datumima i statusima, te redovno ažuriran u saradnji sa Službom za poslove Općinskog vijeća i nadležnim službama.

Ciljevi ove inicijative:

- Omogućiti građanima uvid u rad izabranih vijećnika,
- Osigurati praćenje procesa odgovaranja na vijećnička pitanja i inicijative,
- Podstaci efikasnije djelovanje administracije i izabranih dužnosnika,
- Dokumentovati i sačuvati institucionalnu memoriju.

Molim da se ova inicijativa razmotri i, ukoliko se ocijeni opravdanom, zaduži nadležna služba da pripremi prijedlog tehničke i organizacione realizacije, kao i procjenu potrebnih resursa za uspostavu registra.

-vijećnica Edita Šandal-

1. Zbog učestalih saobraćajnih nesreća često i sa težim povredama podnosim inicijativu za postavljanje 2 kamere i radara na raskrsnicama ulica Semira Frašte i Bosanska. Skoro svakodnevno se na ovoj raskrsnici dešavaju saobraćajne nesreće, a do sada niko od Uprave policije nije nikada targetirao ovu raskrsnicu kao rizičnu za sve učesnike u saobraćaju. Također podnosim inicijativu da se izvrši postavljanje dodatnog zelenog svjetla za skretanje u lijevo. Nadam se da ćete shvatiti ozbiljnost ove situacije i u što skorijem roku riješiti pitanje ove raskrsnice bez obzira na to što u Elaboratu o proširenju radarski sistema ne postoji planiran radar za ove lokacije.

2.Podnosim vijećničku inicijativu za izradu projektne dokumentacije za izgradnju nove fontane na Otoci. Postojeće rješenje nije adekvatno, s obzirom na to da građani nisu mogli koristiti klupe u neposrednoj blizini fontane zbog raspršivanja vode. Smatram da je neophodna rekonstrukcija fontane kako bi se izbjegla česta zamjena pumpi, čija nabavka predstavlja izazov.

3.Podnosim inicijativu za pronalaženje odgovarajuće lokacije za izgradnju sportskog igrališta na području MZ "Otoka", s ciljem realizacije projekta u narednoj budžetskoj godini.

4. Kada je planiran početak distribucije kanti za dvolinijski odvoz otpada na području Mjesne zajednice "Briješće". Građani su u više navrata, putem zahtjeva upućenih Mjesnoj zajednici, izrazili potrebu za rješavanjem ovog pitanja, s obzirom da udaljenost kontejnera od pojedinih stambenih objekata iznosi i do 1 km.

SEKRETAR
OPĆINSKOG VIJEĆA

Elvir Kosovac, dipl. pravnik

DOSTAVITI:

1. Naslovu
2. Predsjedavajući Općinskog vijeća
3. a/a